



REPUBLIKA E KOSOVËS - REPUBLIKA KOSOVO	
KOMUNA E VUSHTRRIË-OPËSTINA VUÇITRAN	
01 Nr. / Br	235/23
Nr. i fq. / Br. st	-7-
Data: / Datum	26.10.2023
VUSHTRRI - VUÇITRAN	



REPUBLIKA E KOSOVËS

KUVENDI I KOMUNËS-VUSHTRRI

PROCESVERBAL
NGA MBLEDHJA E JASHTËZAKONSHME E KUVENDIT TË KOMUNËS SË
VUSHTRRIË, MBAJTUR MË 26 SHTATOR 2023

Mbledhja është mbajtur në sallën e Kuvendit të Komunës së Vushtrrisë duke filluar në orën 9:20.

Në këtë mbledhje ishin të pranishëm anëtarët e Kuvendit të Komunës së Vushtrrisë: Agim Bregaj, Alban Bajrami, Arlind Gogolli, Behar Duraku, Bekim Zabërgja, Blerina Shala, Bujar Pllana, Fakete Dushi, Fatmire Cecelia, Faton Hyseni, Galip Audiu, Gresa Muli, Ilmi Azemi, Kushtrim Hyseni, Leonora Gërguri, Lorik Maxhuni, Melihate Basholli-Latifi, Mensur Kasumi, Mensur Kastrati, Mentor Hasani, Nasuf Aliu, Nurie Halili, Nurten Çerkezi-Gjyshinca, Refik Maloku, Sylejman Mehulli, Ymer Haradinaj dhe Zojë Hajrizi.

Munguan: Adnan Lahu, Agron Perçuku, Spasoje Stefanovi, Ali Januzi, Edona Gashi, Gentiana Rama, Mek Selaci dhe Shkelzen Xhaferi.

Të pranishëm në këtë mbledhje ishin edhe Kryetari i komunës, z. Ferit Idrizi, nënkryetari i komunës z. Shpëtim Zhegrova, drejtorët e drejtorive, përfaqësues të mediave të shkruara dhe elektronike, përfaqësues të shoqërisë civile.

Mbledhjen e hapi dhe e kryesoi Melihate Basholli-Latifi, – kryesuese e kuvendit, e cila konstatoi se në sallë janë prezent 27 anëtarë të kuvendit, kuorum ky i mjaftueshëm për zhvillimin e punimeve të mbledhjes plenare dhe për marrje të vendimeve të plotfuqishme.

Në nderim të rënies heroike të rreshterit Afrim Bunjaku, tani Hero i Kosovës u mbajt një minutë heshtje.

Ferit Idrizi, Kryetar i komunës –Ai tha se këto dy ditë kemi pasë dhimbje dhe mërzi, me rastin e rënies së heroike të rreshterit Afrim Bunjaku, i cili është heroi më i ri i Kosovës. Edhe bota demokratike u solidarizua me neve, sepse ai ra në mbrojtje të sovranitetit dhe integritetit të Republikës së Kosovës. Komunës së Vushtrrisë iu bënë dy heronj nga Policia e Kosovës që ranë në mbrojtje të sovranitetit dhe integritetit të Republikës së Kosovës: Enver Zymberi dhe Afrim Bunjaku. Dua të ju njoftojë se në seancat e ardhshme do t'ua sjelli një propozim për emërimin e shëtitores me emrin e Afrim Bunjakut, ku do t'i bashkëngjitet pjesës tjetër të shëtitores që mban emrin e Enver Zymberit.

Arsyeja pse e kemi caktuar këtë seancë të jashtëzakonshme është për arsye që ta trajtojmë projekt-buxhetin më në detaje dhe të shikojmë bashkërisht se mos kemi harruar projekte të rëndësishme

pa u përfshi. Edhe pse jemi munduar që ti marrim inputet nga qytetarët përmes dëgjimeve buxhetore, grupeve të ndryshme të interesit, shoqërisë civile, klubeve të sportit, grupet e grave, etj. Pra, jemi munduar që të jemi gjithpërfshirës, por nuk do të thotë që e kemi bërë më të mirën dhe nuk kemi lënë zbrazësira, në mënyrë që në kuvend ju t'i paraqitni propozimet e juaja Idrizi në pika të shkurtra prezantoi projekt – buxhetin, ku tha se ka subvencione më shumë në të gjitha fushat se buxheti i këtij viti. Gjendja e rëndë ekonomike-sociale po na imponon që të ndahen më shumë subvencione. Sa i përket investimeve kapitale, jemi munduar të jemi më gjithpërfshirës në qytet dhe fshatra. Ai tha se prioritet i kemi dhënë ujësjellësit, ku fshatrat e pjesës lindore të Komunës së Vushtrrisë janë shumë keq, ku kemi ndarë një buxhet solid për atë pjesë, i bazuar në propozimet e ekspertëve të ujësjellësit, të cilët na kanë sugjeruar të ndërtojmë bazenet e ujit dhe përfundimisht të zgjidhet çështja e ujit të pijes.

Po ashtu, si prioritet i kemi dhënë investimeve në shkolla nëpër fshatra, në mënyrë që të pengohet migrimi në qytet, pasi që në fshatra ekziston rreziku i mbylljes së shkollave në mungesë të nxënësve, kurse në qytet kemi mbingarkim të numrit të nxënësve. Por, kemi planifikuar edhe investime në shkollat e qytetit dhe çerdhe. Ai tha se është bërë planifikimi i renovimit të shkollës “Migjeni” dhe janë ndarë mjetet për shndërrim në çerdhe.

Idrizi deklaroi se lidhur me sallën e sporteve të shkolla SHMU2 ka biseduar me Ministrinë e Arsimit, pasi që është projekt i saj, na kanë njoftuar që ne mos të planifikojmë mjete, sepse së shpejti ministria do ta shpallë tenderin për atë projekt.

Kemi planifikuar që ta fusim në investime rrugën e Studimet, ku vlera e saj është mbi 2 milion euro, e cila do të rregullohet sipas standardeve.

Është planifikuar edhe riasfaltimi i vijave kryesore të rrugëve. Kurse, si problem që na ka dalë gjatë planifikimit të projekt-buxhetit është se kemi disa rrugë që janë pronë private. Prandaj, duhet të kemi kujdes edhe të propozimet që ua kanë dhënë banorët, që fillimisht të definohet prona dhe nëse është private, të shndërrohet në pronë publike.

Ajo që kisha kërkuar nga ju anëtarë të kuvendit është se ta analizoni këtë projekt – buxhet në detaje, jepni propozimet e juaja dhe në fund ju bëj thirrje që ta votoni.

Kuvendi i Komunës me 26 vota “për” aprovoi këtë:

REND DITE

1. Shqyrtimi i Projekt – buxhetit për vitin 2024 dhe parashikimet për vitet 2025 – 2026.

Faton Hyseni, anëtar i KK-së – sa i përket këtij draft-buxheti, shihet që është shumë i përgjithshëm, nuk janë specifikuar siç duhet investimet dhe lokacionet. Kjo me dashje ose nga pakujdesia lë hapësirë për manipulim nga niveli komunal, me kërkesat e qytetarëve dhe grupeve tjera të interesit, si dhe krijon hapësirë për keqpërdorim. Psh. ndërtimi i rrugëve nëpër fshatra, ndërtimi i rrugëve në qytet. Cilat rrugë? A kanë emra ato rrugë? Ku gjenden saktësisht? A janë kërkuar nga banorët ato rrugë? Nëse po, cilat janë ato? S’ka nevojë me lënë hapësirë, sepse të gjitha janë të emertuara. Në lokacionin nga vij unë quhet Stanoc i Epërm. Ekziston edhe Stanoci i Poshtëm. Kurse, në draft – buxhet e keni shkruar “ndërtimi i fushave sportive në Maxhunaj, Lumadh e Stanoc”. Në cilin Stanoc? Çfarë fushe, sepse ka lloj-lloj fusha sportive. Andaj, ky draft – buxhet nuk pasqyron kërkesat e qytetarëve të paraqitura, sidomos në dëgjimet e fundit buxhetore. Si i tillë, është shumë i përgjithshëm dhe nuk specifikon investimet, lokacionet dhe emërtimet e sakta. Po ashtu, linjat investive janë të njëanshme. Prandaj, si i tillë nuk mund ta ketë mbështetjen

time. Nuk mund ta votoj një buxhet, që në shkollën ku punoj mbi 30 vite, prej qeverisjes së Xhafer Tahirit nuk është investuar as edhe një gozhdë, e le mos të flasim për aneks që e kam cekur që disa herë. Nuk mund ta votoj një buxhet, që nuk parashihen mjetet për shndërrimin e ish objektit të shkollës në çerdhe të fëmijëve, sipas vendimit që është marrë në këtë kuvend. Tash e ceku kryetari, por nuk është në material dhe nuk ceken mjetet financiare për këtë çerdhe. I ftoj të gjithë asamblastët që vijnë nga ajo trevë (Stanoc i Epërm): Agim Bregaj, Ymer Haradinaj, Mensur Kasumi, që mos ta votojnë këtë draft – buxhet dhe që mos të anashkalohe projektet tona. Investimet kapitale janë 7 milion, kurse ne si trevë jemi 8% e banorëve të Komunës së Vushtrrisë, që do të thotë se na takojnë që të kemi investime gjysmë milion euro. Ndërsa, në anën tjetër thojnë krejt mjetet po i dërgojnë në Stanoc. Nuk i çojnë në Stanoc, por po na i vidhni dhe po i jepni orientim të kundërt. Paret që vijnë nga qeveria, vijnë për kokë banori.

Si i tillë, nuk e ka mbështetjen time ky draft – buxhet. Nëse mbes edhe i vetëm, edhe nëse 34 votojnë për, vota ime do të jetë kundër.

Sylejman Mehulli, anëtar i KK-së – sot jemi në një seancë të jashtëzakonshme dhe në rrethana të jashtëzakonshme si republikë dhe si komunë për shkak të situatës në veri dhe rënies së heroit Afrim Bunjaku në mbrojtje të sovranitetit, që ne si grup kuvendar i shprehim mirënjohjen dhe respektin e thellë për kontributin shtetëror. Në rrethana të tilla nuk është e lehtë të debatosh për buxhetin që na ka rastis ta kemi në këto rrethana. Nuk mund ta kalojmë një buxhet të tillë si grup kuvendar, as në këto rrethana, për shkak se ky buxhet nuk meriton të kalohet si i tillë dhe këtë buxhet nuk e meritojnë qytetarët e Komunës së Vushtrrisë. Ky draft- buxhet na ka ardhur me ndryshime të vazhdueshme deri mbrëmë, duke ndryshuar analitika, specifika dhe kode të caktuara buxhetore. E tha edhe parafolësi, ky draft-buxhet nuk është i specifikuar. Ai tha se është lajm i mirë që janë rritur subvencionet nga qeveria për komunën tonë, si dhe investimet kapitale janë rritur. Megjithatë, qeveria lokale nuk ka arritur për këtë periudhë të na e sjell një buxhet që ish dashur të jetë sot festë këtu, duke e kaluar një buxhet zhvillimor, që i jep kahje zhvillimit të Vushtrrisë dhe një buxhet që asnjëherë s'ka qenë 7 milion euro për investime kapitale. Ju bëj thirrje asamblastave që ta printojnë buxhetin e vitit të kaluar dhe një pjesë e madhe e projekteve kapitale që kanë qenë të planifikuara që të kryhen për këtë vit, prapë janë sjell në këtë draft-buxhet. Ende nuk kemi përgjigje se çfarë ka ndodhur me ato projekte. Shpresoj që ato mjete nuk kanë shkuar suficit dhe ne prapë do i fusim ato projekte. Kjo po i bjen që Vushtrria në dy vite po e humb një vit të plotë buxhetor. Kjo është një ngecje e jashtëzakonshme.

Po ashtu, mungojnë specifikat e rrugëve, që u cek më herët, mungon gjatësia e rrugëve, mungojnë lagjet, fshatrat. Në shumë vende, duke kamufluar se po i prekim të gjitha fshatrat, planifikohen shuma qesharake, kurse futen në pako disa fshatra, psh: Ndërtimi i kanalizimit në Maxhunaj, Ropicë, Vilanc, Samadrexhë, Ceceli, Sllakoc. Përveç që është vështirë ta planifikosh të njëjtin kanalizim në aspektin gjeografik, për gjashtë fshatra planifikohen 82 mijë euro. Nëse këtë shumë e pjesëtojmë me gjashtë e shihni se me sa mjete mund të kryhet një investim i tillë. Ndërtimi i kanalizimit në Dumnicë, nuk dihet cila Dumnicë. Pastaj, kemi një planifikim enorm në dy rrugë të qytetit: Rruga “Lumni Surdulli” dhe rruga “Bekim Berisha (Abeja)”, ku të dyja bashkë janë 900 mijë euro dhe afër 800 mijë euro në sheshin e qytetit, bulevardi “Adem Jashari”. Kurse, në anën tjetër, kemi plot fshatra, që arteriet kryesore janë në gjendje të mjerueshme, e mos të flasim për rrugë të lagjeve e fshatrave.

Janë pesë fshatra te riasfaltimi i rrugëve në vlerë 45 mijë euro, që po i bie 9000 euro për fshat. Çfarë riasfaltimi mund të bëjmë me 9000 euro. Pastaj, ndërtimi i rrugëve lokale në Dumnicë,

Maxhunaj, Stanoc i Epërm, Lumadh, Vilanc, Ropicë, Pestovë në vlerë 20 mijë euro. Janë 7 fshatra e që i bie më pak se 3000 mijë euro për fshat.

Në shëndetësi është pothuajse e njëjtë me të vitit të kaluar dhe nuk e dimë se çka ka ndodhur me këto investime. Në si grup kuvendar nuk mund ta votojmë këtë buxhet se nuk është i duhur dhe kërkoj që të gjithë asamblastët të jenë në nivel të detyrës.

Ferit Idrizi, Kryetar i komunës – u përmendën dy rrugët “Lumni Surdulli” dhe “Bekim Berisha (Abeja)”, është e vërtetë që kanë investime, por ato janë bërë me projekte detaje dhe aq është vlera e investimeve. Për mua rruga “Bekim Berisha (Abeja)” është arterie kryesore dhe nyje strategjike, sepse ka qasje në autostradë dhe në atë pjesë janë kompanitë më të fuqishme që e bëjnë transportin e mallrave dhe kanë shumë nevojë të kenë qasje në autostradë. Kurse, rruga “Lumni Surdulli” është një arterie e fuqishme që e zbraz një pjesë të madhe të qytetit të Vushtrrisë që shkon në drejtim të fshatit Nedakoc. Pastaj, rruga “Avni Saraçi” është një imazh në hyrje të qytetit dhe që duhet të rregullohet.

U përmendën rrugët nëpër fshatra, me qëllim i kemi futur në atë mënyrë, sepse nuk kanë mbetur edhe shumë rrugë pa u asfaltuar.

Prandaj, ju bëj thirrje që ta votoni buxhetin, sepse është për të gjithë qytetarët e Vushtrrisë

Sylejman Mehulli, anëtar i KK-së – tha se kudo që asfaltohen rrugë, ne e mbështesim. Megjithatë, buxhetin që e ke sjell kryetar, nuk është i duhur dhe sa më parë që e kupton këtë është në të mirën tënde dhe të qytetarëve.

Fatmire Cecelia, anëtar i KK-së – deklaroi se sot jemi thirr në këtë seancë të jashtëzakonshme për ta miratuar buxhetin për vitin 2024 – 2026, konkretisht për vitin 2024. Për ta përgatitur këtë draft iu është dashur shumë kohë, bile për me punu më qetë keni shkuar edhe në Shqipëri dhe keni ardhur në përfundim pa bërë asgjë. Kjo e dëshmon vetë ndërrimi i buxhetit për disa herë brenda një jave. I nderuar kryetar, ke pasë filluar me gojën plot për arsim, rini e urbanizëm dhe në këtë draft-buxhet nuk keni paraparë asgjë për rini, për arsim pak e hiç. Tek drafti i parë, Drejtorja për Arsim i ka pasur të planifikuara 900 mijë euro, kurse te drafti i fundit që na ka ardhur i ka 490 mijë euro. Është fatkeqësi kur kaq shumë përgjysmohet buxheti në Drejtorinë për Arsim. Është planifikuar ndërtimi i shkollës “Bahri Kuqi”, kurse nuk keni planifikuar buxhet. Mirë që ju kish ra në mend që në draftin e fundit keni planifikuar diçka për arsimin parafillor. Ndërtimi i çerdhes është vlera 60 mijë euro. Për cilën çerdhe është fjala? Rregullimi i dhomave për parafillor. A është fjala për dhomat e parafillorëve në shkolla apo çerdhe?

Kopshti “Foleja 2” është një objekt dy kat dhe nuk ka shkallë emergjente. Çuditërisht askujt nuk i bie ndërmend për sigurinë e fëmijëve tanë.

Tek Drejtorja për Shërbime Publike, janë bërë planifikime për ndërtimin e kanalizimeve, kurse nuk janë specifikuar se në cilat vende do të ndërtohen. Du t’ju pyes, se pse prej 24 kodeve buxhetore, vetëm një rrugë e ka emrin, “Niman Ferizi” për ndërtim të kanalizimit. E njëjta rrugë ka hy në planifikim edhe për kubëza betoni dhe nuk kishit planifikuar fare buxhet. Ku janë paraparë ndërtimet e shtigjeve për ecje dhe biciklist?

Drejtorja për Kulturë, Rini dhe Sport kurrë më keq nuk ka qenë. Në draftin e parë të buxhetit i ka pasur 430 mijë euro, kurse në draftin e fundit vetëm 160 mijë euro. Me 30 mijë euro nuk mund të bëni asgjë në restaurimin dhe konzervimin e objektit “Arkivi i vjetër” – ish fabrika e vajit, se ky projekt kushton më shumë. Pastaj, renovimi i platosë në Kalanë e qytetit, për këtë duhet të bëni kërkesë, sepse këtë objekt e rregullon Instituti për Mbrojtjen e Monumenteve, e jo komuna, e cila

është vetëm menaxher i kalasë. Është viti i tretë që nuk e keni ndarë asnjë cent për muzeun e qytetit që njihet si shtëpia e Mahmut agë Gjinollit, i cili është duke punuar ilegalisht, sepse nuk ka pranim teknik.

Te stadiumi “Ferki Aliu” ju kisha sugjeruar që ti mbuloni tribunat te zhveshtoret, sepse kanë filluar të demolohehen.

Prandaj, trajtoni qytetarët në mënyrë të barabartë, mundohuni t’ua përmirësoni kushtet e infrastrukturës të gjithë banorëve, e jo vetëm militantëve.

Faton Hyseni, anëtar i KK-së – kryetari na tha që paraqitni kërkesat. Kryetar tregoj qytetarëve edhe asamblistëve tuaj se unë nuk di të bëjë kërkesa private. Kërkesat i bëj me shkrim dhe me datën 11.09.2023 i kam bërë tri kërkesa për tri fshatra, e jo kërkesa të mia, të cilat ja kam drejtuar kryetarit dhe kryesueses.

Bekim Zabërgja, anëtar i KK-së – tha se do të flas shkurt dhe qartë për draft – buxhetin për vitin 2024. Buxheti për investime kapitale është 6,926,738.00 euro. Ky buxhet, këto investime kapitale këto dy vitet e fundit është buxheti më i mirë i mundshëm, për shkak se janë përfshirë të gjitha fushat ekonomike. Prandaj, këto mjete i kemi në dispozicion dhe secili prej jush le të bëhet kryetar apo drejtor dhe të na tregoj se ku me i shpërnda. Prandaj, këto mjete janë shpërndarë në mënyrën më të mirë të mundshme. Kam qenë në terren dhe e kam parë në fshatra dhe qytete se 98% e rrugëve kryesore janë të asfaltuara. Unë kam propozuar vetëm segmente të rrugëve për asfaltim, sepse rrugët kryesore janë të asfaltuara. Prandaj, çdo fushë e jetës ekonomike dhe sociale është përfshirë. Ai tha se e kemi obligim që ta votojmë buxhetin, sepse qytetarët presin nga ne si përfaqësues të tyre që ta votojmë buxhetin dhe mos ti lëmë ata pa investime. Prandaj, ai ftoi anëtarët e kuvendit që ta votojnë buxhetin, ashtu siç kemi votuar vitin e kaluar (në mënyrë unanime), sepse tha se është më i miri i mundshëm për shkak të mundësive buxhetore që ka komuna.

Alban Bajrami, anëtar i KK-së – deklaroi se sot po e paraqes interesimin e komunitetit sportiv dhe qytetar për meremetimin e fushës sportive “Musa Abazi”, e cila gjendet afër parkut të qytetit. Ajo fushë ka filluar të renovohet në fund të vitit 2021 dhe që nga ajo kohë nuk është filluar të investohet asgjë dhe ka mbetur ajo punë e papërfunduar. Ajo fushë paraqet një simbolikë të veçantë, sepse aty janë zhvilluar turne të karakterit lokal dhe nacional. Vlen të ceket mbajtja e turneut në futboll të vogël apo futsall, ku tubonte të gjithë futboll dashësit e të gjitha qyteteve të Kosovës, me një pjesëmarrje prej 2000-3000 shikues. Pastaj, garat në hendboll si për meshkuj ashtu edhe për femra.

Behar Duraku, anëtar i KK-së – dua t’i shpalos disa kërkesa që kanë dalë si rezultat i dëgjimeve buxhetore, ku në dy takime isha i pranishëm edhe unë: Në Stroc dhe Druar- që përfshihen tetë fshatra. Në Mihaliq, rruga për ndriçim 600 m, kanalizimi në lagjën “Bunjaku”, kanalizimi në rrugën “Çlirimi”, ndriçimi në rrugën kryesore në Mihaliq – “Shaban Kapuçi” – 600m, rregullimi i rrugës “Çlirimi”. Pastaj, në Bukosh, asfaltimi i rrugës “Mehmet Kollari” – 150m, pastaj rruga “Gani Hajrizi”. Në Stroc, shtrimi i trotuarit nga shkolla e Strocit në gjatësi 1km, rruga “7 Dëshmorët”. Asfaltimi i rrugëve: “Halim Aliu” 100m, asfaltimi i rrugës “Lan Aliu” 100m, asfaltimi i rrugës Armend Aliu” 50m, asfaltimi i rrugës “Nexhmedin Duraku”, asfaltimi i rrugës “Sahit Duraku”, asfaltimi i rrugës “Xhafer Duraku”, asfaltimi i rrugës “Arben Duraku”, asfaltimi i rrugës “Kadri Duraku” 50m, asfaltimi i rrugës, segmenti “7 Dëshmorët” 50m, asfaltimi i rrugës

“Lan Aliu”, rruga e Përparim Aliut 100m, asfaltimi i rrugës “Lan Aliu”, rruga e Mexhid Duraku 100m. Pastaj, në fshatin Beçuk, asfaltimi i rrugës “Rexhep Murati” 400m, asfaltimi i rrugës “Jahir Murati” 400m, ndriçimi në rrugën “Avdyl Haliti” 300m, kanalizimi në rrugën “Abdyl Haliti” dhe “Faton Syla” me gjatësi totale 600m.

Në fshatin Gllavatin, rregullimi i hapësirës së monumentit të Batalionit të Parë të Brigadës 142 të Zonës Operative të Shalës të UÇK-së, asfaltimi i rrugës “Rexhep Konjuhi” 100m, asfaltimi i rrugës “Driton Islam Hasani” 100m.

Në fshatin Bivolak, asfaltimi i rrugës “Nazif Klinaku” 50m, asfaltimi i rrugës “Berishaj” 60m, asfaltimi i rrugës “Imer Saraçi” 100m.

Në fshatin Zhilivodë, asfaltimi i rrugës “Ahmet Krasniqi”, rrugica Lutaj 150m, si dhe rregullimi i kanalizimit.

Ymer Haradinaj, anëtar i KK-së – sot jemi në një seancë të jashtëzakonshme dhe në një gjendje të jashtëzakonshme, për shkak të zhvillimeve që kanë ndodhur ditëve të fundit dhe me këtë rast i shprehu ngushëllimet më të sinqerta familjes së heroit, Afrim Bunjaku.

Dy vitet e para të qeverisje suaj, e kemi votuar buxhetin në mënyrë unanime. E kemi votuar buxhetin në mënyrë që ta shohim se cilat janë prioritetet tua si kryetar i komunës, por edhe të partisë tuaj. Vitin e kaluar kemi paraqitur kërkesat në këtë kuvend që na është thënë se do të merren parasysh, e që nuk janë marrë parasysh. Kjo punë duhet analizuar dhe që ka ndoshta ka punë edhe për organet e drejtësisë. Ky buxhet nuk është gjithëpërfshirës në aspektin gjeografik dhe si i tillë nuk meriton përkrahje. Vitin e kaluar janë larguar kiflet për nxënës, ne kërkojmë që të futen në këtë draft.

Në fund të debatit lidhur me këtë pikë të rendit të ditës, kuvendi me 16 vota “për”, 7 “kundër” aprovoi buxhetin për vitin 2024 dhe parashikimet për vitet 2025 – 2026, për këtë pikë u vendos me sa vijon:

1. Me këtë vendim aprovohet buxheti i Komunës së Vushtrrisë, për vitet 2024-2026, konform Qarkoreve Buxhetore 2024/01 dhe 2024/02 për komuna të lëshuara nga MFPT-ja, për vitin 2024 dhe projektionet për vitet 2025 dhe 2026.

2. Shuma e përgjithshme e buxhetit të Komunës së Vushtrrisë për vitin 2024 është **26,770,039.00 €**, prej të cilave për:

	Kategoritë buxhetore	2024	2025	2026
1.	Paga dhe mëditje	13,209,301.00 €	13,248,929.00 €	13,288,676.00 €
2.	Mallra dhe shërbime	4,840,000.00 €	4,902,920.00 €	5,035,299.00 €
3.	Shpenzime komunale	571,000.00 €	612,683.00 €	652,507.00 €
4.	Subvencione	1,223,000.00 €	1,333,070.00 €	1,413,054.00 €
5.	Shpenzime kapitale	6,926,738.00 €	8,071,569.00 €	9,182,130.00 €
	Totali:	26,770,039.00 €	28,169,171.00 €	29,571,666.00 €

3. Të hyrat vetanake të planifikuara.....**3,418,154.00 €**.

4. Mjetet financiare të cekura në pikën 2 dhe 3 të këtij vendimi janë në pajtim me Qarkoret Buxhetore 2024/01 dhe 2024/02 të MFPT-së, si dhe në bazë të kufijve buxhetorë.

5. Për zbatimin e këtij vendimi obligohet: Drejtoria për Buxhet dhe Financa, Kryetari i komunës dhe drejtoritë tjera kompetente komunale.

6. Tabela 4.1- plani i ndarjeve buxhetore të shpenzimeve për vitet 2024-2026, (kopja e shtypur prej SZHMB, të vulosura si dhe nënshkruar nga kryetari i komunës dhe ZKF). Tabela 4.2 – financimi i projekteve kapitale për vitin 2024 dhe projekteve kapitale shumëvjeçare për vitet 2024-2026 (shtypur nga sistemi PIP, vulosur si dhe nënshkruar nga Kryetari i Komunës dhe ZKF-ja). Tabelat 4.3 plani afatmesëm i të hyrave totale të buxhetit komunal nga grantet qeveritare dhe të hyrat vetanake (shtypur nga BDMS, vulosur si dhe nënshkruar nga kryetari i komunës dhe ZKF-ja), si dhe tabelat e buxhetimit të përgjithshëm gjinor janë pjesë e këtij vendimi, të bashkëngjitura në shtojcë.

7. Ky vendim hyn në fuqi pas aprovimit dhe nënshkrimit nga kryesuesi i kuvendit dhe i njëjti i dorëzohet Ministrisë së Financave për zbatim.

Mbledhja përfundoi në orën 10:40.

Bastri Duraku



Procesmbajtës

Melihate Basholli - Latifi



Kryesuese e Kuvendit